

Pisortat inissiaataannik aqutsinermi akissaajaatit ikililernerqarsinnaanerannik periarfissat pillugit misissuisoqarnissaanik apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen,, Partii Naleraq)

Akissuteqaat

(Ineqarnermut, Sanaartornermut Attaveqaqatigiinnermullu Naalakkersuisoq)

Inatsisartuni ilaasortaq Hans Enoksen, Partii Naleraq, pisortat inissiaataannik aqutsinermi aningaasartuutit ikililernerqarsinnaanerannut periarfissat pillugit misissuisoqarnissaanik apeqquteqaat aallaavigalugu oqallinnissamut siunnersuummik saqqummiussaqrpoq. Sipaartutissanut, attartortut, pingaartumillu akissaatikinnerusut ineqarnermut akiliutaannik ikilititsisussanik siunnersuusiornissaq tamatumani siunertaavoq.

Inatsisartuni ilaasortaq Hans Enoksen immikkoortunik amerlasuunik, ineqarnermut akiliutit katitigaaneritut, taamaalillunilu ineqarnermut akiliutinut akilernerqartartunut sunniuteqartartunik saqqummiivoq. Aamma Namminersorlutik Oqartussat inissiaataasa ingerlanneqarnerini pitsannguinnissamut inissaqarmat ilumoorpoq.

Pingaartumik ingerlatsinermit aningaasartuutit naatsorsuutini annertupput. Taamaattumittaaq A/S Inissiaatileqatigiiffik INI-p inissiaatitta pitsaasumik ingerlannissaannut qulakkeerinnissaa Naalakkersuisut eqqumaffigisorujussuaat.

Ineqarnermi ingerlatsinermit suliassat siunissami suliakkiissutigineqartarnissaannut kissaammik Naalakkersuisut saqqummiussisimapput. Suliakkiinermi suliassat tamatigut pitsaasumik sapinngisamillu akikinnerpaamik isumagineqartarnissaat qulakkeerneqassaaq – tamannalu attartortunut toqqaannartumik iluaqutaasussaavoq. Naalakkersuisut isumaat malillugu suliakkiineq najukkani pilersuisuusut, illoqarfinni ataasiakkaani pigineqartut ataqqillugit ingerlanneqassaaq. Taamaalilluni najukkani suliffeqarfiit namminersortut mikisut, soorlu eqqiaanermik, illuutini sullissinermik aserfallatsaaliuinermilluunniit suliaqartut taparserneqassapput. Tamanna pisortat ingerlatseqatigiiffiitut angisuunut taarsiullugu namminersortunngorsaanermit, najukkani suliffeqarfinnut amerlanerusunut inissaqartitsiviusumut annertusititseqataassaaq. Qitiusumik aqutsinermit taarsiullugu tamanna najukkani oqartussaaqataanermit aammalu najukkani aqqiissutissanut pitsaasunut nukittortitsissaaq. Ingerlatsineq pitsaanerulerpat attartortut toqqaannartumik iluaquserneqassapput.

Inatsisartuni ilaasortap Hans Enoksenip ineqarnermi marloqiusamik aqutsisoqassanngitsoq ilanngullugu tikippaa. Marloqiusamik aqutsinerup pinngitsoortinneqarnissaanut Naalakkersuisut isumaqataapput. Maannarpiat A/S Inissiaatileqatigiiffik INI inissianik, Namminersorlutik Oqartussanit kommuninillu pingasunit pigineqartunik aquataqrpoq. Tassani marloqiusamik aqutsisoqartoq oqartoqarsinnaanngilaq. Kommuneqarfik Sermersooq aalajangersimavoq nammineerluni inissianik aqutsisoqarniarluni. Taamatut aalajangiisarneq kommunit nammineerlutik aalajangiisinnaanerannut ilaavoq.

2005-imi Aaqqissuusseqqinnissamut Ataatsimiititaliap Namminersorlutik Oqartussat inissiaannik kommuninut tunniussinnissamik inassuteqarnerata kingorna, kommunit

Namminersorlutik Oqartussat inissiaataannik tiguisinnaanerit pillugu kommuninut isumaqatiginninniartoqarpoq. 2005-ip kingorna ukiuni tulluittuni inissianik tiguisinissaq kommunit tungaanniit kissaatigineqanngilaq. Taamani inissiat aserfallatsaaliorneqarnerminni pitsaanngereernerat tamatumunnga pissutaavoq.

Ineqarnerup ilusilernerqarnissaanut periarfissat assigiinngitsuupput; Siunnersuisarfik COWI ineqarnerup siunissami ilusilernerqarnissaanut iliuusissanik aalajangersimasunik siunnerfeqartunik inassuteqaasiorluni suliaqarpoq. Siunissami ineqarnermik ilusiliinissami nalillit inuiaqatigiinnit pilersinneqartut qulakkeerneqarnissaasa aallaavigineqarnissaa isiginiassallugu pingaaruteqarpoq.

Inissiat A/S Inissiaatileqatigiiffik INI-mut, piffissap ilaani immikkut ittumik aserfallatsaaliuinissamut ukiumoortumik aningaasaliissutitalimmik tunniunneqarnissaat periarfissat ilaattut COWI-p tikkuarppaa.

Taamaalillutik kommunit aamma toqqaasinnaalissapput, inissiaatitillu A/S Inissiaatileqatigiiffik INI-mut aningaasaliissutitut atorsinnaalissallugit. Kommunit taamaalillutik A/S Inissiaatileqatigiiffik INI-mut piginneqataalersinnaapput.

Siunissami piginnittoqarnek, politikikkut annertuumik tapersorsorneqartoq pillugu aalajangiisoqarnissaa pingaaruteqarpoq.

Naggasiutigalugu oqaatigerusuppara, ineqarnermut akiliutit aserfallatsaaliuinerup ingerlatsinerullu qulakkeerneqarsinnaanerit periarfissanut sunniuteqanngitsumik appartinneqarsinnaannginnerat iluoomat. Taamaattumik ingerlatsinerup pitsanngorsarneqarnissaa inissiallu aserfallaqqissanngippata aningaasat isumatusaartumik atornerqarnissaat siunnerfigisariaqarparput. Inuiaqatigiinni nalillit qulakkeerneqarnissaannut inissiallu najugaqarfigineqarsinnaanissaasa isumaginissaanut pisussaaffeqarpugut.

Ineqarnermut akiliutit tamakkiisumik appartinneqarnerat isertitaqqortuunut isertitakitsunullu eqquisussaavoq, kiisalu ineqarnermut tapiissuteqartarnermi isertitakitsut ineqarnermut akiligassanik akiliinissamut tapersorsorneqarnissaat qulakkeerneqartussaavoq. Tamanna pissutigalugu ineqarnermut tapiissuteqartarnek inuiaqatigiinni najukkatsinni sanngiinnerit tapiissutinik isertitaqartartunut allanut naleqqiullutik naammattumik isumagineqarnissaannut naammannersoq misissorneqartariaqarpoq.

Naalackersuisut suliniutinik arlalinnik ingerlataqarput. Apriilip qaammataani ineqarneq pillugu isumasioqatigiissitsinissamik ingerlataqarnissaa kiisalu ineqarneq pillugu aqqissuusseqqinnissarpamik suliaqarnissaa matumani pineqarput. Tamatumunnga atatillugu erseqqissaatigineqassaaq, aqqissuusseqqinnissaa najoqqutassanik arlalinnik, politikikkut suliarineqartussanik imaqarmat. Aqqissuusseqqinnissamut siunnersuutip saqqummiunneqarsinnaalernissaa anguniarlugu susassaqarfiit arlallit misissoqqissaarneqassapput.

Naggataagut uteqqillugu oqarusuppunga – aap – Namminersorlutik Oqartussat inissiaataasa ingerlanneqarnerini aningaasartuutit ikilisinnissaannut periarfissaqarpoq – aamma aap – tamanna attartortunut iluaqutaasumik atorluarneqartariaqarluinnarpoq.

Taamatut oqaaseqarlunga neriutigaara, Inatsisartuni ilaasortanit pilersitsiviulluurtumik immersorneqarluta oqallillarumaarluta.